

**Kuala Lumpur:** Sambutan menggalakkan daripada masyarakat terhadap aktiviti pertanian bandar mendorong pelbagai pihak khususnya pihak berkuasa tempatan (PBT) memperluaskan inisiatif berkenaan.

Selain Local Agenda 21 Kuala Lumpur (LA21 KL) kelolaan Dewan Bandaraya Kuala Lumpur (DBKL), usaha berkenaan dilaksanakan Majlis Perbandaran Subang Jaya (MPSJ) melalui komuniti setempat di bawah pentadbirannya.

Menurut Penolong Pegawai Pertanian MPSJ Mohamad Rafidzi Rasdin, program Kebun Komuniti yang dimulakan oleh MPSJ pada Julai 2013 itu pada asalnya bertujuan menangani isu kewujudan tanaman secara

haram di bawah kawasan PBT berkenaan.

Katanya, pendekatan yang dilaksanakan itu juga membolehkan penduduk bekerjasama rapat dengan MPSJ terutama dalam menyalurkan aduan secara terus kepada mereka.

"Sebelum program ini diwujudkan, kita sentiasa menerima aduan berlakunya kegiatan tanaman secara haram. Jadi, ini pendekatan yang diambil

dalam menangani masalah itu menerusi projek perintis di Pangaspuri Garnet pada 2013.

"Pada masa sama, ia menjadi landasan kepada MPSJ menjalin hubungan akrab dengan penduduk setempat terutama dalam menyalurkan aduan.

"Ia memberi kesan positif sebaik saja Kebun Komuniti ini dilaksanakan," katanya.

Sejak dimulakan pada 2013, 21 Kebun Komuniti diwujudkan membabitkan

556 peserta di dalam kawasan MPSJ yang mengusahakan tanaman seperti sawi, kangkung, bayam, kailan, terung, cili dan timun.

Selain itu, Mohamad Rafidzi berkata, menerusi program berkenaan, komuniti terbabit dibantu secara 'one-off' terdiri daripada tanah, anak pokok serta benih tanaman.

Bagaimanapun katanya, mereka mempertimbangkan beberapa faktor sebelum meluluskan permohonan komuniti untuk mewujudkan kebun terbabit antaranya kesesuaian serta jarak tapak kebun.

"Kita menerima sekitar lapan permohonan setahun tetapi tidak semuanya diluluskan memandangkan kawasan dicadangkan itu bukan di bawah MPSJ.

"Kita juga mahu memastikan jarak kebun dan rumah mereka tidak begitu jauh.

"Terdapat tiga kategori komuniti yang terbabit dalam program ini iaitu rendah (pangaspuri), sederhana (rumah teres) dan tinggi (kawasan elit).

"Namun, kita kini ingin memberi lebih fokus kepada pangaspuri melalui kerjasama Badan Pengurusan Bersama (JMB)," katanya.

# Sambutan hangat pertanian bandar dorong PBT perluas inisiatif

## FAKTA

Program Kebun Komuniti dimulakan MPSJ pada Julai 2013



KEBUN Komuniti Majlis Perbandaran Subang Jaya.